

四庫全書

史部

欽定四庫全書

水道提綱卷十六

原任禮部侍郎齊召南撰

浙水

浙水有南北二源北曰徽港南曰衢港至嚴州府城東南會而東北經杭州府城南又東北數折至海寧入海

北源徽港亦曰新安江其源有四一出徽州府治歙縣

西北與黟縣相連之黃山即古黟山今日林歷山也

兩澗合而東流流經黃山司東南又東南至府城西

俗曰西界河有東界河自東北來會又南至府城西

南之浦口有南港河自東南來會江流始大又東南

至街口鎮南入浙江嚴府西界

東界河即浙之東源古所謂揚之水出龍

嵓山流合大障山水者也今績溪縣北界崇山關南

一溪西南流經縣城南而西有二小溪自北來注之

又折而南仁里村南大溪自東來孔靈村西溪自西

北來並會又西南經新館村西又西北受一溪水又

西南經府城西北而西與西界河會西界河即古豐

樂水也又南至浦口南港河來會浦口即古所謂歙

浦也 南港河又有二源其遠者一出黟縣西北西武嶺之東一出縣東北黃山司西南山中並南流經縣東西至城南十餘里而合又東南流經漁亭鎮南又東南經休寧縣南境五城鎮之北有率山水古所謂漸江源者南自婺源北境龍尾山之東北塔坑鎮之西北山中北流經五城鎮東而北與黟溪合又東北經休寧東南之屯溪鎮南有霽溪俗曰縣港河者西北自縣城西南而東南流注之又東北流至浦口與正源合而東南曰新安江 按浙源有四西界河出黃山北者為北正源東界河盡滙績溪諸水其東北源也黟縣水古所謂橫江水出武亭山吉揚水出吉陽山魚亭水出魚亭山者其西北源也休寧南婺源北古所謂率水出率山俗曰張公山浙溪出浙嶺東流與率水合者其南源近西者也四源水至浦口而盡合論者必謂率自嚴府西界南流折而東經威山為正恐未必然

平鎮南又東經淳安縣城南有東溪自東北來注之

又折而南流經灌口鎮東有龍溪西南自遂安縣來

注之

龍溪即武強溪出遂安縣西界馬金店北山東流至縣西南有靈巖溪出縣西北界之靈巖山

東南流注之又東經縣城南又東稍北流至灌口鎮南與新安江會

又折而東北流經

茶圃頭又東經建德縣西之洋溪鎮南有艾溪東南

自壽昌縣來注之

艾溪有三源出壽昌西南山東北流至縣城東南而合折而西北流

注新安江

又東北流經嚴州府治建德縣城西南有小溪

自北來注之又東至城東南衢港水南自蘭溪來會

而北流形如丁字江流益大矣

新安江自淳安而下亦曰青溪

會合

在城東南一清一濁

北源新安江清南源衢港水濁古人嘗以河濟喻之

南源有二一曰衢港一曰婺港 衢港亦曰信安江其

源有二一曰金溪源出開化縣西北之馬金嶺一出

縣東北之百際嶺合流而南經縣城東又西南經界

首東有二溪一自西北界來注之一自西南來注之

即出蘇章鎮者又東南至常山縣西境折而東流經

縣城北亦曰金川溪又東稍北至衢州府城西江山

文溪自西南來會

常山縣西有三衢山東有常山即信安嶺草碑係縣南地與江西玉

山縣界故馬金溪

為信安江上源

文溪西南出江山縣南界之仙

霞嶺北流至峽口左受一小溪水又北經鳳林鎮西

折而東北流至石門鎮西南有小溪自東南來注之

又北經清湖鎮西折而東而北分為二支經縣城東

而北復合東北至百靈街西南有二小溪自東南來

注之又東北至衢府城西與金溪會

文溪南出仙霞與福建界即信

安江南源

金溪會文溪曰雙港口東北流經府城北而東

有柘土溪自東南來注之

柘土溪出府南車床山之南山東北流經龍鼻頭西

又東北至府東南折而西北流經府城東至東績渡入信安江水頗長

又東北經安仁

街北又東北至龍游縣城北停步驛之北有筍籊溪

自西北來有桃溪自南來注之

筍籊溪出壽昌縣南界鷄籠山之陽東南

流入信安江

桃溪即靈溪源出遂昌縣北高平山之陽東北流經北界村東南折而北流經龍游縣城

東而北注信安江

信安江至龍游曰漱溪亦曰盈川溪又東

經湖頭北又東北至羅埠有湯溪縣水自南來注之

湯溪縣二溪西曰小龍溪東曰派溪俱出宣平縣北界山北流並經縣城之西又北至花園村游埠東合

流注信
安江

又東北與婆港南渠會於蘭谿縣西南又東

北至城西南婆港北渠亦來會 婆港亦曰東陽江

源出東陽縣東界之大盆山西北流經定安鎮東北

俗曰歌溪有溪自西北來會溪流始大

北源出東陽縣北界之白

峯嶺東南流經溪口村北有小溪自東北來會折而西南流經村東南又西南至巍山村東北有巍溪自東會又西南至定安鎮 又西經縣城北俗曰雙溪又北遂會大盆水而西

西經義烏縣城南又西南有荆浦溪東南自東陽來

會

荆浦溪出東陽縣東界之千丈嶺西北流經安文村南又西北至長衢村西有夾溪自東北來會經

湖溪村南又西北流經縣南又西
北流至義烏縣西南與雙溪合又西一小溪自南

來注之又西至蘇溪市南折而西南流有航慈溪自

東來注之

航慈溪出東南西北流經赤岸街南又西
又西北至航慈村之北與雙溪合

又西

南流經金華府城南有梅溪自南來會亦曰雙溪也

梅溪即南溪亦曰縉雲水源出縉雲縣東北之蒼

嶺北流有好溪東北自大盆來會西北流經湖陳北

館頭西又北經永康縣東南華溪自東北來注之又

西桃溪自西北來注之又西經縣南至楊公橋西有

小溪自北來注之至相琴村南折而西北流至武義
縣東白溪村北有熟溪自縣西南來會又西北經縣
城履坦村北又北經小溪村東受一小水又西北與
東陽港會於府城之南 雙溪既合而西有小溪自
西南來注之又西北流分為二派南渠西南流受白
龍溪水白龍溪南出千年山北流經白關橋東北注之折而西北流至羅埠
西與衢港會北渠西北流經蘭谿縣城南而西與衢
港會 二港既會北流經城西女埠東有小溪自西

來注之又北經香溪鎮西又北至嚴州府城東南與

西來之新安江合流而北

南港水較北港猶大

二江合而北經城東北之富春驛又北經富春山麓亦

曰嚴陵山有釣臺下為七里瀨

富春山在桐廬縣南三十五里兩峯對立

有二釣臺皆臨險

又北為胥口

胥溪出桐廬縣西南山俗曰安仁溪東流經縣南而入浙

又北而東經桐廬縣城東南又東北桐溪水自西來

會曰桐口

桐溪上源即天目溪源出於潛縣西北之西天目山俗稱柳魚溪者東南流為紫溪

有二溪東北來會經縣城西又南有藻溪自東來會又南至麻東埠北有昌化縣南之柳溪雙溪合而東

注之又東南至分水縣東北有小溪自東北來注之
又南分為二派經縣城東復合而東南有前溪水西
自城南來注之又東而南至桐廬縣之西南折
而東北經城西而北而東入浙即古淳溪紫溪又東

北至富陽縣界有溪西北自新城縣城來注之

新城縣有

東溪南流西溪東南流至縣東南而合東南流入浙又東北至富陽縣城南有

篠嶺水自北來經城西南注之

以上俗稱富春江下稱錢塘江海潮將

至富陽而止有定山橫踞江岸在錢塘縣南五十里又東有數巨洲折而北流

經東岸蕭山縣西南境有浦陽江即浣江南自浦江

諸暨會數水而西北流注之

浦陽江源出浦江縣西境之深梟山曰東溪東

南流又一源出縣南之五路嶺曰南溪東北流至縣城南合而東稍北五十里有一水南自義烏西北之咸村橋北流來會又東北流經白馬橋又東北經諸暨縣南境曰上西江又東北至丫口有上東江東南自東陽界合孝義開化二溪東北流又合超越下瀨二溪經街港來會曰浣江又北經縣城南又東北五里分為二派一東北流曰下東江合東南來落馬橋水又北有泌湖及雙橋溪水自東來會又北稍西有楓橋北水東自山陰界來會又西北至三港口一西北流曰下西江有五洩溪西自五洩山合二溪來會又北有新港水自西來經直埠南而東來會北至三港口復合曰大江其分凡七十里復合也又西北流臨浦鎮西其東為山陰界古道東至錢清者已塞今自臨浦又西北流入浙江此水源流三百餘里越城入舊稱西小江臨浦又北經公館東為錢塘縣西南口在蕭山南三十里江浦里

境於山東麓折東北流經錢塘驛南又東北經杭州府城東南南岸即蕭山縣西之西興驛也又東稍北

經蕭山北境又東北五十里至龕山與北岸海寧縣

西南境之赭山相對如門入於海

海口濶五十里曰龕子門東四度極

三十度四分又北為北岸海寧城南又東南為南岸紹興府山陰縣北境之三江口

附錄西湖在杭府城西周三十里南西北皆山疑即古

武林水不與江通為游觀勝地其水引貫城而東

出灌海寧縣田

浙東諸水

三江紹興府山陰會稽蕭山三縣諸水之尾閭也腹曰

鑑湖古稱周三百五十八里南並山凡水出南山者

皆匯北屬府城漕渠

紹興運河西自西興驛東經蕭山縣城中又東經錢清鎮入山

陰界經河橋共百里至府城西郭門皆順流也穿城中會稽界自東郭門東溯高埠至東關分為二渠一

東至曹娥壩一東南至嶸壩共九十餘里此為運道自東南至府城亦順流也鏡湖故跡僅存城西南一

處餘皆水田但支港縱橫四通八達俱至府城之北匯為巨流又北過陡壘至三江所入海有閘以時蓄

洩鑑湖源在會稽東南境曰東溪其源無數其大者曰若耶溪出若耶

山曰寒溪出日鑄嶺曰上灶溪曰平水西北流經樵風涇又北為會稽山禹陵又西北至府城東南

山陰西南境曰西溪

亦有數源稍大者曰相溪出藏山嶺曰巧溪出崇山曰餘支溪

即溫涼二泉之合也俱東北流至府城西南與鑑湖會俗曰白塔洋

三江閘又名星宿

閘在府城北三十里

三江所城西門外有二十八洞其地西北去浙江口鼉子門八

十里東去曹娥江口數十里陰已築臨浦會稽已築嶮壩東西二小江俱不從此

按閘從古名其實山

口入海矣

曹娥江即古剡溪源出天台及東陽經新昌西北為三

溪至嵯縣南而西港來會曰剡溪

源一出天台之萬年山及石橋俱西

北流一出東陽之玉山北流至新昌西南三十里之
長潭溪又北至縣北而東溪南自城東來會曰三溪
又西北至嵯縣南有西港
合二溪自西來會曰剡溪稍東折東北流經浦口有
溪自東南來會

新昌北之王宅溪也一源東南出寧海三坑一源東出奉化沙溪

又

北流經清風嶺嶠浦三界過東山至嶢壩東南為曹

娥江

江東上虞界江西會稽界

又名上虞江北稍西經梁湖及百

官鎮西又東北會夏蓋湖水至瀝海所西入海

此水越人

曰東小江源流四百餘里潮勢亞于錢塘

寧波府甬江即鄞江有南北二源 北源曰姚江亦曰

舜江出餘姚縣西南八十里之太平山西北流至上

虞縣南乃東北出經餘姚舊城新城中間而東

上虞縣東

北十里中壩十八里下壩過壩即姚江水

又東經慈谿縣南曰前江藍溪

文溪諸水皆流合焉其南有大西小西二壩東南有南港東港與奉化江會于寧波府城西南者二壩之下流會于府城東北者南港也又東分流為鎮海縣西南入江者東港也南源曰奉化江亦曰北渡江亦曰東剡溪源出奉化縣西南連山蘇木嶺東北流

經縣城東南而北稍西有東剡溪西北自陳公嶺東
南流來會又北分為二派北派稍東北與慈谿二壩
下流會又東至府城南南派復合又東北至城東北
與姚江之南港會又東北與東港會經鎮海縣城南
即大小浹江總匯也又東一里至招寶山前浹口南
曰金鷄嶼北曰虎蹲山又前曰蛟門入於海

寧海縣水稍大者曰浮溪

在縣北四十里源出奉化西
南界山東南流經馬岙南又

東匯柵墟嶺
西北入於海

天門山水又東至浮門
天門在縣北六十里

曰大溪白溪

大溪

出西北黃崖嶺東南流曰石瑜溪會桃花坑牛頭潭諸水又東南與白溪會白溪出天台華頂山東流折而東北流經縣南又東與大溪合曰雙港至亭頭南東入海曰海游溪海游在縣一西北出天台東界山東流經吳岙高窺東南入海一南出和寧嶺北北流東溪來會又東北入海

台州府靈江亦曰澄江有天台仙居二源北源出天台縣西南與東陽接界之大盆山東北流會南來小溪寒明及北來峇溪諸水至平頭潭又東北至縣西南之清溪街有清溪西北自關嶺東南流合南來之左溪北來之秀溪銅溪百丈壘瀑水嶺二溪諸水來

注之

左溪出鷓鴣山秀溪出萬年山銅溪即桃溪出桃源山百丈壘水出瓊臺瀑水嶺溪出桐栢山

又東有赭溪自北山流經西廓而南來會

赭溪出五峯雙澗巖

石皆丹以地脉由赤城山來也

過城南而東有螺溪自北來注之又

折而東南經東橫山之麓折而南有歡溪自北合東

來之靈溪倒溪諸水自東北來注之又南受二淡溪

水又南經臨海縣西北境百步嶺之東麓小石嶺八

疊山之西麓左右受小水無數又東南而仙居溪水

自西來會曰三江

天台大溪亦曰始豐溪所合諸水稍大者縣西之清溪縣東之歡溪

即楠溪也

南源出仙居縣南境與永嘉接界之坑山北

流與西南出縉雲界之馮師山二水東流而會又東

北流有橫溪合永康界之蒼嶺二溪水自西北來會

蒼嶺在縣西一百里一名嶺裡溪一名木溪俱東流合於橫溪又東南與大溪合仙居水以蒼嶺為大

又東北流會諸小水經瞿灘鎮北又東北經田頭村

北有馬嶺溪自北來注之

馬嶺溪源出縣西北界東陽安文村之南山南流與

瞿溪合又南流與大溪合大溪止通竹筏與天台同

又東經縣城南曰大溪

亦曰永安溪又東白水溪自北來注之

白水北出天台界之紫籜

山南流至城東折而東北流左右受小水無數又東南東流入大溪

北經白水洋北折而東南流與天台大溪會於三江

始可行舟

三江在府城西北二十里

二水既合東南流經府城

之西而南而東至雙江口北受臨海東鄉諸溪匯於

大田港之水

縣東有柘溪灘溪周家溪潮際溪雲溪東溪西溪虎溪寨溪黃肚溪小芝溪諸

水以諸山迴抱勢不能東入大海故西南流經規橋諸村過少兩山而南與靈江合又東南七

十里黃巖縣城北之永寧江自西南來會亦曰椒江

永寧江在黃巖縣城北有大小二源大源西南出永嘉北界之塵山東北流合諸山水小源曰黃巖溪出

縣南黃巖山下東北流合諸山水二流既合又東至官畚村始可行舟又東百里過縣城北又北稍東二十里會靈江東入於海海口西至黃巖城六十里西北至府城一百二十六里海潮北至三江口而止又東經章安鎮金鰲山南麓又東海門山前所東對岸即海門衛城靈江入於海

太平縣有新河口

在縣東四十里河自黃巖縣東南至溫嶺長一百三十里別為九河各

二十里綿亘兩縣八鄉之田舊有閘十一入海之口即新河所城東五里是也

溫州府甌江亦曰永嘉江自處州府大溪其源有二

西南源曰龍泉縣大溪源出縣西南之臺湖山

俗曰小梅

溪以其南出小梅嶺之北麓也南麓水流入閩注建溪

東北流至縣西南有獨

溪自西北來會

獨溪出縣西北界山東南有小溪自西南來會東北入大溪

折而

東流經城南而東稍北有靈溪自北來會

靈溪俗曰梧桐溪二

源俱出縣北山合而南流入大溪

又東稍北有安仁溪自西南來注

之又東經雲和縣北又東北有小溪自西南來注之

又東北經均溪村北保定鋪南遂昌松陽之大溪自

西北來會

西北源曰遂昌縣大溪源出縣西南貴

義嶺北流折而東北又東經縣城南而東有後溪自

西北來會

俗曰雙溪出縣西北錢村嶺諸山東南流經縣城之東北又南注大溪

又東

南經金岸界首田市南又東南經松陽縣城西南又

東南流有小溪自西南來注之又東南經五尺禹溪

保定與龍泉雲和水會 二大溪既合東北流經碧

湖鎮東又北至處州府城之西南有虎踏溪西北自

宣平來會

虎踏溪有二源一曰西溪出宣平縣西北山東南流一曰東溪出東北嵒次山西南

流至縣城南而合東南流又西合一大溪

東經府城

南而東有縉雲縣溪自東北來會

溪源出蒼嶺西麓西南流經縉雲縣

城東南又西南至府城下河又東南數折經小郡海

關之東南西南流入大溪

臘溪出自東北來注之

臘溪出青田縣東北山有二澗

口臘溪村南有臘溪自東北來注之

西流合而西南又折而西而南至臘溪村東南入大溪

又南經大洋村南溪流始濶又南至青田縣西北有彪溪西南自景寧縣來

會

彪溪俗曰外卸溪源出景寧縣西南山東北流有忠溪自東南來會又東北流經縣城南又東北流

有小溪自南來會又東北入大溪

又南折而東經青田縣城南又東

北流數十里折東南流入温州府永嘉縣之西北境

始曰安溪

自處州府至青田縣有七十二灘之險至此始無巨石故名

經林福小

京二村南又東南至府城北有楠溪北自仙居界大

山東南流合諸溪水而南至潮滌來會

楠溪曲折行三百里亦甌

地巨川潮滌在城北十里

過孤嶼而東有永寧河自城西南匯瞿

溪諸水為湖經城內外東北至海壇斗門來注之

永寧

湖即會昌湖繞城內外其東南出為瑞安河其西出為甌浦

又東三十里經樂清

縣西南界曰館頭江又東至磐石衛南對岸為永嘉

境之寧村所北入於海曰甌江口

此水合二府眾溪水勢甚盛口在府

城之東九十里有二洲曰大靈崑小靈崑

瑞安縣飛雲江源出泰順縣北之百丈流東北流莒岡

溪自西來會

莒岡溪出縣西北山東流經天關山之北又東入大溪

又東北有

小水自西南來會又北有小水自西北來會又東經

瑞安縣城南又東至江岸寨南為飛雲江口

舊曰安陽江亦

曰瑞安江

平陽縣橫陽江源出縣西南有二一南出分水關與福

建界曰南港一出西北山中曰北港合流而東經縣

城南又東南為橫陽海口

自橫陽而南金鄉衛南有數港口皆小溪

自平陽而南至分水關為甌閩分界但閩地福寧一府及羅源連江二縣水皆山溪東入海無有南入建

江者今叙次於浙東諸水之後

福寧東南濱海其險曰烽火門然海渚曲

入非有巨川注海故但於海下詳之

福寧府北境水一曰分水關南水自關西南流折而南經銅山營東又南有一溪西北自界山東南流一溪南自店頭深山北流來並會水勢濶如潮澤又東南曲曲流百三十里經南鎮北又東南至沙埕入海

其南

即南鎮滬其東

一曰硤門港溪

合三溪東南流至北洋村之南硤門

北即南關也

之北東入海

一曰楊家溪

出府北山南流經湖平鋪西折東流合北來一

長百餘里

水經三沙堡北又東至牙

城南又東入海長百餘里

府西有長溪三源東北

源出浙江泰順縣源又有二

一曰龍溪出泰順縣北山穿城而南一曰白溪

自西北山南流經縣西而南合西來一水東與龍溪會

合而南入福建界經壽

寧縣東境曲曲而南百餘里曰交溪經嶺口寨西又

南百餘里經福安縣城東折而西南流與北源會

北源曰平溪出壽寧縣東境山兩澗合而東南流

與交

溪隔一山相
去二十里許

曲曲二百里經福安縣城西又東南與

交溪會又南四十里而西北源來會 西北源曰托

溪出壽寧縣北界嶺頭南流穿城而南折東南流合

東北來一水曲曲流

在平溪之西隔一
山相去三十里

二百里至福

安西境之穆洋鎮西又東南三十里而交溪合平溪

自北來會東南流經白石司北又東南至大梨東入

海港即長溪也

源流長三
百餘里

又西曰外渺溪出浙江

慶元縣東南山東流三十里入福建界經壽寧縣西

境有一溪北自慶元之東境山東南流入界折而西

南流來會

此水東去托溪僅十餘里

又南合西北一水又南流兩

山間百數十里折東南流經周墩堡南又東南百數

十里至金垂寨南入海港

源流長三百八十里港口東去長溪之口五十里

溪入寧德縣界

又南為五丈溪出馬嶺東南流合北一水

又東南經銅鏡渡南又東南折而東流至雲淡門入

海港

源流長二百餘里港口北去外渺溪口十餘里

又南為龍溪出寧德

縣西北山東流百數十里經七都南東南流經縣城

北有一水自西來會

即穹窿溪也

又東南至馬鞍寨入海

港

源流二百餘里港口北去五丈溪口六十餘里自長溪至此入海皆海港曲入內地者

又

南為羅源縣之羅川一曰起步溪自梨洋嶺東流至

縣北合北來九龍村水東南流經城東而南有鰲峯

水西自城南來會又南入海港又東南至西澗北入

大海又南為連江出福州府北山東南流曰寶溪

經連江縣城南又東至東岱堡北入海

羅川連江俱百餘里

江之南曰閩江

水道提綱卷十六

欽定四庫全書

水道提綱卷十七

原任禮部侍郎齊召南撰

閩江

自浙以南踰仙霞合建寧邵武汀北之水會於延平
東南經福州入海源流幾二千里建江也閩地群川
為最巨

閩江即建江上源有三曰建溪即浦城崇安水也曰富

屯溪即邵武光澤水也曰沙溪即汀州寧化清流

也

建溪即北源邵武富屯即西源汀寧化即西南源至延平而俱會亦曰劍江至福州府曰南臺江

建溪即建寧府大溪其源又有二東曰浦城南浦溪西

曰崇安崇溪浦城南浦溪源又有二東北源出浦

城縣北之漁梁汎

在楓嶺小關驛南諸山中東二度三分極二十八度三分南流

數十里有牛嶺水自東北界上西南流來會南流曰

南浦溪又南至新嶺有二小溪自西北合而來會又

南經縣城東南折西南流其西北源曰新溪自西北

來會於城南

西北源出縣西北漁梁山即與江西界峯陽關東南山也新溪東南流經數十里至

縣西北有二小水自東北合而來會又東南流至城南與南浦溪合

又南至水口左受

一小水稍南右受一溪水又南左受太平橋溪水經

觀前塘西又東南有臨江溪自西北來會

臨江溪出峯陽關大

嶺東南流數十里至陽溪尾西南會一小溪折東流經西鄉街南又東南流過臨江橋又東南經綿山嶺西又東南至北街村之西北而南浦溪自北來會折西流五十里合西北來

一小水折西南流至塔嶺東折南流經馬嵐墟營頭

驛東又南經建陽縣東境諸山之水麓又南至建寧

府治甌寧縣西北之葉坊驛東北而崇溪自西北來

會

自源至此已曲
曲行四百餘里

西北源崇溪亦曰大溪交溪汶

溪源出崇安縣北亦有二西源出縣西北與江西鉛

山縣界之分水關嶺下東南流經望仙舖南又東南

曰西溪又東至楊庄南有乾溪合諸小水自北來會

又東經縣城北稍東而東源自東北來會即東溪也

東溪出縣東北與江西界之焦嶺關折西南流經嵐角
寨口山麓折東南流有大潭塘一溪自北來會又西

南流至縣城東北與西溪合

既會東溪南流經城東稍南折西南

流曰大溪經赤石街東稍南有梅溪自東北來會

梅溪

出洋源隘南山南流經寨口東又西南流七十餘里入大溪折而東流經仙店北

又東折而南流經興田驛東南右受小溪水又東南

流經建陽縣北境又東南經縣城東北折南流至城

東南有小溪自東來注之又有建溪自西北來會於

城南之建溪驛

建溪源出西北與邵武界大山合三水南流百餘里至界首東南有一溪

西自邵武東北山東南流經林墩折而東北流來會

又東經江防南又東北流有一溪西北自大白坊來

會又東有街口溪自北來會折東南流又南稍西有

至建陽縣城西南又東南與崇溪會

徐墩溪自西來注之折東南流至甌寧西境之豐樂

塘北又東南至葉坊驛與北來之南浦溪會崇溪源流亦四

百餘里所合諸水較多於南浦溪

二水既合東南流經建寧府城

西北有溪自東北山來注之

即小松街北山水也

南經城西亦

曰西溪至城西南有東溪東北自浙江龍泉慶元西

南流經松溪政和二縣合諸水經府城東南而西來

會亦曰當陽溪也

東溪源有二一曰松溪出處州府龍泉縣小梅嶺之南其北即小梅

溪水北流入甌江者也松溪南流過竹口入都二鎮而慶元縣竹溪水自東南來會竹溪出慶元縣東山溫

粵西北流經縣城北又西有小溪自南來注之又西至八都鎮與松溪水合二溪既合流入福建松溪縣界西南流有小溪自北來注之折而南經縣城東其南有小溪來會折西流過城南有小溪自北來會又南流稍曲東南流經政和縣西南境之西津南有七星溪東自東峯塘合東南來之胡屯溪西流經縣城南來會南流經舖前東又南為當陽溪口又南為黨口汛有小層溪自東南來注之又西南流經東陽街南又西南經東峯街南又西南經建寧府城東南又西與浦城崇安之建溪名西溪者合此水源流與南浦崇溪等寔建溪東別源也以在既會東溪水勢建寧府治建安縣東境故名曰東溪

始盛東南流數十里折向西流復東南流有深溪東南自石亭汎山來注之曰南雅口折西南流經延平

府治南平縣東北境之大橫驛東又西南至府城東北境南流至城東南之劔津亦曰延津而邵武及汀州二源合自西北來會

延平人稱建溪為劔溪以其東北自建寧南經黯淡灘而

西與邵汀之西溪會於劔津也亦曰東溪

富屯溪即閩江西北源也出光澤縣西與江西界山者二一曰西南之黃關東北流合東南一水經金坑北流數十里有極高隘水自西來會又東北流會杭川為大溪一曰杉關水即杭川東流至水口村與金坑

水會而東北數十里至縣西南有長山水自西來會

又北經城西而北有花橋二溪西北自沿岱村山東

南流合而來會

此水源北山即鐵牛關水西流入江西者

自城東北折而

南經城東曰大溪亦曰紫雲溪又南至漠口南折東

南流經邵武府城北有樵溪自西南穿城中來會折

東南流經城東稍南有溪自西來經城南而東合南

一小溪來會又東南流屈曲山中百餘里至拿口驛

西折而東流九十里歧為二派經富屯驛北而南復

合南流有順陽溪東北自仁壽司西南流來會折西南流又南數十里經順昌縣城西而將溪西自將樂縣會建寧泰寧二縣諸水來會將溪亦閩江一源也

亦曰金溪

將樂金溪源出建寧縣西有三處一曰西南之寧溪最遠出與江西界之靈嶺及

北車橋鎮山二水東流而合曰南橋溪東南流數十里經安遠司西南合南來伍家坊水東北流經司東有巖坑水自北來會又東北經均口寨西又北數十里至縣西南西北兩源合而來會西源曰落洋溪出與江西界之麻嶺北山東流九十里有蘭溪自南來會折而北流與北源會北源曰均溪出與江西界惠心隘大山中二水合東南流百里餘與西源會又東數里會寧溪三源既合東北流經縣城東南

受南一小水折而北經城東稍北有古溪北自竹溪
隘東南流來會又折東北流受南一小水又東北至
梅口北有梅溪東北自大埠岡合諸山水西南流百
五十里經泰寧縣城南合黃溪而西南來注之水勢
益大自梅口東南流數十里有三溪寨水南自黃坑
嶺北流來注之折而東流經黃潭市南又東有池湖
溪南自鐵嶺北流來注之又東稍北曰金溪至將樂
縣城東南折東北流有龍池溪西北自山中東南流
經光明村南而東南來會於城之東北又東北有小
溪自南來注之又北有安福溪北自隔嶺萬安嶺南
流來注之又東北流經高灘市北會石村南過交溪
橋經漢布街北有小水自南來注之又東南流經大
槎壩北又東至順昌縣城之西南而富屯溪自
北來會此水源多流長行六百里勝于富屯既會

金溪東流經城南又東稍北有石溪自南來注之又

東北流為鷓鴣溪東北自大吾嶺西南流經大歷司
北而南來注之地曰上洋口折東南流經王台驛北
有黃泥溪自南來注之又東南至沙溪口東北有沙
溪西南自沙縣會寧化清流連城永安歸化之水東
北流來會

富屯源流
六百餘里

沙溪即閩江西南源也出寧化縣西境與江西贛州府
石城縣界有二處北自長放坑東南流其正西曰西
溪出塹頭嶺東流與會又東五十里經禾口墟北折

東南流至縣城西南與淮溪會淮溪即西南一源也
出長汀縣北界孤西嶺淮頭山東北流數十里與西
溪合東流經縣城南又東至魚龍舖北有東溪北自
打鐘嶺南流經城東來注之又東南有楊蘇溪合二
水自東南來注之又東至清流縣西境有前溪自北
來注之又東稍南折而東北至縣城西北隅又東北
折而南經城東又東南有玉溪東北自五通嶺西南
流經玉華驛南合西來之嵩溪而南流注之又東南

數十里有文川溪西南自連城縣合諸水來會

文溪二源

南源出連城西山東流至城南合東南來一水經城東又合東來一水東北流曰岡溪又東北其西北山二水合流曰山下溪自西北南流折而東來會又東數十里與清流溪會溪至清流曰清

溪亦曰九龍溪經九龍灘至鐵石磯頭東南流經安

沙司南遂東曲曲流至永安縣西境有西溪自西南

合數水來會

西溪數源一曰莒溪即新泉司西北山水也東北流七十里西有連城東南之

新乾嶺龍瓜嶺二水合東流為背溪來會東有嶺後村水自小陶壚來會又東北流百餘里經洪田村南又東北數十里至永安縣西境與龍溪會又東北至縣城西北有南溪南

自城西北流來注之

南溪出縣南馬山北麓東南流會東南來西洋村水折西北流

經縣城西又北入龍溪

又東北有東溪自東南來注之亦曰燕

溪稍北有安定溪西北自蓮華山來注之

安定溪出蓮華山東

南流八十里經大湖村南又東南與燕溪會

又東北經貢川村南有坊溪

西北自湖坊市山東南流來注之

坊溪自歸化縣南山東流經湖坊市

南又東南流百里至貢川西南入燕溪

又東北至沙口村西北有沙洋

溪西北自歸化縣來會

沙洋溪出歸化縣西南山東北流經縣城北有石溪南自

南山北流穿城北來會又東折東南流百餘里經夏陽市南又東南至沙口村西北入燕溪

稍北

有松洋溪南自松洋山來注之

溪在沙口村東

又東北經三

元街西北又東北至沙縣西南境曰沙溪有羅布溪

自西南注之又東北經縣城南又東北有五水合為

一溪自北來會

正北曰壩溪東南流經中堡西又南流西高橋西南有東溪自東北

來會又有西溪西自北鄉寨之南東流來會又南流數十里有富口溪自西來合西南來之夏茂溪東流來會折東南流經沙縣東北又南入沙溪沙溪又東北經霹靂灘亦曰太

史溪經漁溪街南又東北至延平府西北境之沙溪

口與邵武之富屯溪會

是曰西溪東南流有洪溪

自南來注之又東經府城南劍津而東溪北自建寧

府來會

西源西南源合于沙溪
口沙溪源流七百餘里

東西二溪既合於延平府城南水勢大盛東南流至土

埠洲有龍溪自南來注之又東南經大洲有吉溪自

東北來注之又南流有尤溪西南自大田尤溪二縣

合諸水東北流來會曰尤溪口

尤溪出大田縣西南
武陵舖之北山梨子

嶺及龍背嶺諸水合東北流又東北數十里有林柄
溪自西北合羊子嶺水東注之又東北經縣城南又
東北有柳溪西北自高里嶺東南流合北來銀隔嶺
之花溪東南流來會又東北經溪演板南折北流稍

東至高才司東曰湖頭溪又北曲曲百餘里至尤溪縣城東南有溪合諸水自西南來會即尤溪別源也

源出西南蓮花山東麓鹽嶺之南東南流合大佛

嶺諸水折而東北數十里有英溪南自山中北流經

花橋來會又東北經新橋又北有一溪西北自山濬

嶺諸山東南流來會又東北八十里至縣西南有銅

溪西北自秋竹嶺東南曲曲流來會又東北至縣城

東南與尤溪會二溪既合北流經城東稍北折西

北流有均竹溪東南自檀嶺來注之又西北有山坑

水自西北合北來之玉溪南流注之折東北流有

塔兜溪自北來注之又東北七十里至尤溪口入建

江志謂尤溪源出龍岩及德化二地非也源在大

田西南去龍岩建江又東流有同仁溪北自夏山西

隔遠數百里

南流二百餘里來注之又東經倉峽司南黃田驛南

有上洋溪北自水朝嶺來注之又東南至古田縣南

境之水口驛有大溪亦名劍溪北自縣城合諸水南

流來會

大溪三源一出縣西北白祭嶺東南流一出縣東北之黃居嶺西南流至城之東合焉南

流數十里一源出東北前山者曰西洋溪西南流經吉口村來會又南曰劍溪又南至水口驛之東入建

江建江自延平之南平至此水雖盛而灘險未平

又東南經摸天嶺下江流

始出險就平又東南經閩清縣北境折而南至縣東

又南溪亦曰梅溪西自城北合西南數水來注之

南溪

出閩清縣南馬坑嶺北流合西南一水又北曲曲數十里至縣西南有西溪自西來會又東北有下祭溪自

東南來會又東北經縣城西
北又北折而東南入建江又東稍南經大穆村東

北有穆溪自南來注之又東南經白沙驛南竹崎所

北又東南經甘蔗塘南有成塘溪自北來注之建江

自古田閩清至府治候官西境江流浩瀚至芋原曰

洪塘江遂分二派其東出經府城曰南臺江
南臺山在府南

亦曰釣其南出而東南曰陶江
洪塘在此江之北支浦分合

相錯
在候官西南有陽崎吳山鳳岡澤苗延澤仙坂六浦實一江之支津也南臺江

東流經芋原塘北又東經洪塘北有支津與陶江通

又東岐為二渠十數里復合經福州府城南有小溪

自城西而東南來注之

即侯官西界水

又東南數十里至鼓

山與陶江合

陶江東南流經芋原塘西南又東南

有雙溪西南自永福縣會德化縣水東北流來注之

雙溪出德化縣西南之雪山曰龜龍溪東北流經縣城南折北流經其東又東北百餘里至嵩口街西有嵩溪自西北來會又東北百餘里至永福縣西有漁溪北自馬坑嶺南麓來注之又有三井溪東北自赤岸山西南流經城西而來注之又東流經城南有穴利溪東南自六洞嶺廣業山西北流來注之又東北流百餘里至洪塘西南入

陶江 此水即西峽江

又東經洪塘南有支津北

通南臺江又東南至烏龍口江流浸潤亦曰烏龍江
東流至青浦之北而南臺江自北來復合 二流既
合東流經批驗所北又東福清長樂二縣水自南合

而北流注之

福清縣北境水有二北流合經坑田西折東北流會長樂水長樂縣城二小

水西南流與福清水會北流入建江水口在長樂城西二十里又東北流至閩安鎮

東急水門西為內海口水濶數十里港口之北為琅
琦山又東北為福斗山自急水門而東南即長樂城
北境港中洲嶼無數曰小蘆大蘆巴豆其東最崢嶸

者五虎門也是為閩江大海口

五虎門北與定海所黃崎堡北焚司相望

南與梅花所相連與海壇山相望其正東即白犬洋東沙也

福府東三度極二十六度強

五虎門東

三度半極二十五度九分至二十六度三分自浦城至海口行一千三百里

閩江以南諸水

興化府江西南會仙遊縣水有三溪一曰南溪出縣西境白隔山東麓東南流數十里折東北流至文殊寨南折北流又東北至縣南有西溪西自祥雲山來會又北至城南有鳳陽溪西北自高坪嶺東南流經城

西南而東來會曰三會溪亦曰九龍溪稍東北有九

鯉溪自東北來會

九鯉溪出東北何嶺山中有九鯉湖水匯南流數十里與九龍溪會

又東北流至府治莆田縣西境岐為二派一東北流折而東經府城南曰延壽溪又東有赤土溪西北自廣業山前東南流經府城東北而南來會一東流十里又岐為二俱東流曰木蘭溪至黃石寨之北復合又東北與延壽溪合曰三江口稍東有梅花溪北自六洞嶺東南流經涵江鎮西而南來會東為海口

此水

源流三

百里

泉州府晉江有二源 西北源曰桃林溪出永春州西

北雪山南麓

其北麓即德化縣西南之雙溪北經永福而入閩江者

東南流數

十里有小溪自北來會東流經州城南又東折而南

經東關橋西稍南有八坑溪東北自湖洋堡來會又

南數十里折東南流有羅溪東北自海渦山西南流

經小羅村來會又東南經南安縣西北境有洪瀨水

自東北來會又東南數十里而安溪水自西南來會

西源曰藍溪亦曰碧溪出安溪縣西北劍山東南
流數十里經湖頭市北又東南至魁斗村南有小溪
自北來會折南流經縣城西有歸溪西南有歸窰嶺
來會折東流經城南又東流百餘里曰羅渡溪至南
安縣西境與桃林溪會曰雙溪口亦曰黃龍溪東南
經南安城西南又東南流經泉州府治晉江縣境為
晉江又東南經府城西石塔山下又東南經法石司
南有二溪西南自五龍山古陵東北流合而來注之

又東至岱嶼入於海

海曰北曰下安瀝崇武所南曰日湖寨東南隔海正對澎湖臺

灣

未出海口其東北即洛陽港口也

漳州府九龍江源有二西北源曰寧洋之九鵬樂溪西

源曰龍巖之雁石溪

九鵬溪出寧洋縣西北山東

南流曰西洋溪有小溪南自大吳地村東流來會東

南流經縣城南有馬山水自北來經城東而西南來

會又東南流曰九鵬溪而樂溪自東北合三水西南

流百餘里來會

樂溪源曰高浮溪出高里嶺西麓其東即羊子嶺之柳溪東合大田諸水

北至尤溪口入閩江者高浮溪南流折而西南經桃源司南有一溪北自大佛山西南流來會又西經早達村南有一溪北自蓮花山南麓南流來會又西南流經寧洋東境凡百二十里與九鵬溪會此水源流與九鵬等

又南經茶林堡東又東南經漳平縣西北境有和睦溪東自長安嶺西南流來會又南有萬安溪西自舊鵠嶺東南流來會又南經縣西境而雁石溪西自龍巖來會雁石溪出龍巖州西之楊梅嶺東南流經大池村南又東南有小溪西自九山來會折東北流經船荅南又北流至州西有一溪西北自艾

嶺南流經石碑西南合小池水折而東流來會又東流經州城南又東經雁石司南又東折東北流至基

泰村西又東北至鹽場村東北有白沙溪自西北來

會

白沙溪出州北新泉司之南山東南流百
里至白沙汎南又東南與雁石溪會

又東流稍

北至漳平縣西而寧洋九鵬溪自西北來會 二溪

既合東流過漳平縣城南又東折東南流有黃畬溪

自南來注之又東南流有感化溪自東北來永福里

溪自西南來並會水如十字

感化溪出留地洋山西
南流經白石隘北又西

南來會此水源北山即武陵鄉梨子嶺尤溪之源也
永福里溪即下折溪出西南朝天嶺北麓其北源
水即和溪也此水東北流經永福里又東北有
須村水自西來會又東北入大溪水口相對 又東

南有山溪自北來注又南循山東麓數十里折而東
十餘里又南流入漳州府治龍溪縣北境曰九龍江
經龍頭嶺下謂之峽中又南經長泰縣西境即龍溪
北境也有龍津溪東北自磨鎗隘西南流經長泰城
東南而西來注之又東南經府東境江東驛水始出
峽曰柳營江東南經玉洲城西南有南溪亦曰龍江

西自府城之南會西北南靖縣雙溪諸水來會曰三

汭河口

南溪即龍溪有二源一出南靖縣西北朝天嶺南麓其北水即章平縣東南之下折溪也

此水西南流數十里經和溪司西南折而東南流經平南驛南龜洋山北又東經金山鋪北又東南至永豐司南有深渡溪自北山合三水南流來會又南流稍東經縣城西至城西南隅與西南源會一出南靖西南平和縣東北之高山兩澗東流合而東南至瑄溪汎北折而東北流經三平院西又北經官寮山東麓洪瀨口是曰瑄溪又東北數十里有山城溪自西北山來會折而東流至南靖縣城西南而和溪北自城西來會既合曰雙溪東流經城南稍東北流至天寶市南折而南流經府治西境又東南流經府城西南又東曲曲至三汭河口入柳營江即海澄縣之西境也又東經南坂北有溪自

西來注之

此溪又在南溪之南自九龍山東流至南坂

又東經海澄縣城

西有溪西自馬口寨合二水至洪礁汛之東北注之

江流甚濶洲渚星羅又東經城北而東過海門山南

岸復有支港來會

即洪礁溪之分流東注者

又東入海

南岸圭嶼北岸古浪

嶼其東有當港一大洲即廈門也又東為金門

閩地水自建江外此水為

大源流行六百里兼六七州縣溪澗

漳浦縣南溪出縣西靖龍縣東南流經城南又東南合

二小水至舊鎮前入海

又雲霄溪出縣西北天馬

山南流經縣西南境之雲霄城東南流合數小水又東南有梅洲溪自西來會又東入海 詔安縣東溪

即南陂溪出縣北及平和縣南界金扇嶺西南流數十里合西北來二小溪折東南流經大布寨西又南受數水又東南曰羊尾溪至縣城東北會西來城北水又南經城東又東南至懸鐘山入於海水口與廣東分界其南即海中之南澳也 廣東分水關之西

有黃岡河源出饒平縣東北界山西南流至縣城東

有溪背村南水經城東北來會又東南流受西來之
河門溪又東南受二水至黃岡鎮入於海

汀水即鄞江

汀府正當京師正中南度東西二溪之合正直丙丁極二十五度八分

源出

汀州府治長汀縣北與江西界之英竹山觀音嶺東

南流曰龍陂溪數十里至府城東北有龍溪東自館

前驛後山西流來會

此山之東即山下溪東南流至連城縣東北境南合山岡溪東

北為文川至九龍合寧化清流二縣之水至延平會邵武水入閩江者也此山亦自黃竹山蜿蜒而東南為分水之脊志言寧化縣南有大溪源出縣北萬斛泉分流為清流縣之清溪其正流南入府治長汀

縣界為鄞江亦曰東溪左溪下流經廣東大埔縣入海有五百灘亦曰汀水按寧化雖與長汀接界但淮溪自西而東其南隔大山峻嶺者數重宜有水能踰越而至長汀者乎南經城東曰東

溪折經東南而西有西溪西北自皇祝嶺東南流至

城西南境來會

此水之西即萬安溪西南流至古城司入江西界為貢水之上源

又

南流至河田鋪西有一水自東來注之又南經大潭

三洲二鋪西稍折東南流至車田鋪東又東受一水

復南流至水口鋪東又西受一水稍南至背遠館西

南有山坑溪西自江西界上黃峯嶺東流合一水而

東南來會又東南經回龍藍屋官庄東至珊瑚舖北

有水自西南來注之

此水出武平縣東北境東流經官堡北又東北入龍陂溪又

曲曲東南流至上杭縣北境有舊縣溪東北自朗村

隘西南流二百餘里來會

即新乾嶺水自朗村隘山西南曲曲百餘里至桃頭

村西桃排隘東又西南至舊縣東南又西南數十里入龍陂溪

又南折而東流經縣

城北有一水東北自將軍橋合左右二溪西南流來

注之折東南經城東有一水東北合桂竹嶺白沙二

溪南流石灰嶺西麓折西南來注之又折西南流經

城南復折東南十餘里又南流數十里至萬壽山東
折東南流至峰市之東河墀城之西有永定縣溪東

北自太平山西南流合諸水經縣城南而西來會

永定

溪出永定縣北與龍岩州界之太平山東南流至太平司西又南有大唐凹水自西來會西南流至新羅坑有文溪東自象山西流曲曲來會又西南至溪口村東南合西北來二小水又南流經羅灘東又南經縣東又南有當風嶺水自東來注之折西流經縣城南又南受一小水又西南至河墀城之北西入龍陂溪又西南流入廣東界
在永豐縣西南境撫民館之南
經大埔縣北境坪砂塘西北折南流有小溪自東南來注之又西

南流受西北來小湖水又南經縣城西龍陂溪至大埔以南曰神泉河又南經福員塘西又東南經西江塘東南有小靖溪東北自福建永定東境古竹汎山西南流入境來注之

小靖溪出古竹汎西南流數十里
有石龍溪自東南來會又西

流數十里受東北來一小溪又受北來水曰新村溪折而南流經天德坪西三層嶺東入廣東界經大埔縣東境曰小靖溪又西南流數十里有一小水自東南來會又西入龍陂溪

又西南至三

河司東有大靖溪東自福建平和縣會數水西流來

注之

大靖溪即平和縣之合溪也二源一出縣北境之葛山西南流入漳汀司北有凹頭嶺水自西

北來會又西南經留恩村西受西來一水又西南經平坦西又南受東來一水又西南至縣西界之白土村東北而合溪東南自城南西北流來會合溪即別源也自縣東北高山為分水嶺其東即瑄溪流合漳州府之龍江者此水西南流至平和縣城東南折而西過城南稍西有一溪自東南來合遂曰合溪又東北流與葛山水合西至白土村南至廣東界又西南流折而西北曰大靖溪經大崖司北又西北經白猴鎮北又西北合一其西有一大溪自西北會武平小水又西入龍陂溪

鎮平平遠三縣自西南會長樂興寧程鄉三縣諸水

來會于三河司之東合口塘之北

福建武平縣水大源出縣西北與江

西關界之關

山關流合一水東南流入界數十

里有大楊橋水自北來會又東南經縣西又東南至

武平所東南而夾城左右二水合于城南曰花龍溪
自東北來會又東南自盤龍隘山東麓有岩前寨水
自東南來會折西南流經春來村之西入廣東界經
鎮平縣北境有一溪西北自平遠縣城東合西來南
北二水東南流又南受三水北受一水來會折東南
流又西受一水又南經鎮平縣城西南有一溪自城
東南合北來之筆山水東南來之大峯嶂水西南流
來會又南稍西有一溪西北自平遠縣南境之大信
舖合南北數水東南流有北受貓頭山水南受嵩山
水東流來會又折東南流有一溪南自程鄉縣北境
北流來會又東南數十里而程鄉大溪自西南來會
程鄉南大溪出長樂縣西北境藍關之西北大山
兩源合東南流經兩口塘之東藍關之西又南有一
溪自西南合三水來會折而東流有一水自北來注
之曰青溪河折東北流至縣南有縣西溪西北自霍
山東南流合五小水經城之西南來會又東有一水

自東北來會入東流有溪自西南來會源流更長
溪源出龍川縣東南之天柱山大悟山二水東流合
而東南受北一小水南二大水折而東北有石馬嶂
沙嶺錫坪山三水自西合而東來會又東北有一溪
自南合二水北來會又東北與長樂溪會既合東
北流至興寧縣東南境有石馬溪西自縣城合諸水
來會石馬溪出興寧縣西北境南流東合一水西
有龍母山水自西來會經羅洞東東南流有黃疏水
自東北來會又東南流西受二小水東受一水又東
南經縣城西南折而東流過城南有石馬洞水自北
合分水凹水南流經城東來注之又東數十里而長
樂大溪自西南來會既會東流數十里折東北流
經水南壩西北又東北至程鄉縣城南有溪合二水
自西來一水自北來俱會程鄉西北有高潤東南流
合數小水至大坪南又東南至城西南有鹿子山水
及分水凹東水自西南合而東北流來會其北水自

縣北山合二澗南經城西又南會二溪而東入長樂
大溪也既會東經城南又東至西洋塘北有藍田
水自南來注之又東北流有銅鼓嶂及柑子山二水
自南合而北流來注之又北流受東來一水又北與
鎮平溪水合鎮平程鄉二溪既合東北流至豐順
司東有蓬辣灘西水自北合數水東南流來注之又
折東流經蓬辣灘又東經洋陶坪南又東
南至三河司北東與龍陂溪大靖溪會

三水既會

水勢甚盛西南流經銀溪塘西折東南流至宋公塘

東富塘西有上槎溪東南自饒平縣北境西西流來
注之又折西南流經潭灣轉水塘西又南南至小留
舖西有銀溪西自潘田司南合小溪壩水東流來注

之折東南流經烏石塘西又東南至松林塘西有桐溪東北自饒平西南境南流來注之至此名曰韓江東南經曲灣東至鳳樓西西受一小水又東南經潮州府北至城東北折而南經城東東受一水又南而揭陽江水支津自西來會又東南至海澄縣西北岐為二派一東流經縣北復分二渠東入海

一港曰東隴港北岸

即東隴所也其南曰北港西南即縣城

一南經縣西境又分為三港入

海

最東曰南港在縣南又西南有二港潮府中近東二分海口極二十三度五分韓江即汀水源

流七百餘里
亦巨川也

揭陽水曰琴江出永安縣東境紫簾山鷄公嶂及天雪
嶺三水東南流合於琴嶺之北又東南曰北琴江數
十里有一水西自南嶺來會又南有一水西南自蓮
花山來會又東流曰南琴江有獨山水自北來注之
又東南受西南來之旗頭嶂水折東北流經普寧縣
西境明山麓又東北折而東至石母山之南普寧北
境即揭陽縣西南境也有揭陽山水自西北合二溪

東南流先分二支渠來會

揭陽山自龍川縣東南之天柱山又南為大梧山又

南為永安縣東北之紫簾山鷄公嶂又東為天雲嶺
為排嶺又東南為北琴江北岸山又嵩螺山又東稍
北為瘦牛嶺為飛雲嶺其東南為貴人山龍發山雙
山石母山其北為揭陽山連峯相接為五嶺極東南
之委又北即天堂山黃土嶺山勢蜿蜒數百里此水
自揭陽山下東流北合天堂山蘇姑山二水東南流
數十里至縣西北一支南入琴江又東南復分一支
南入琴江又東流分一支南會又東流經縣城北又
分一支南會又東晉寧縣鯉湖溪自西南經縣城
東南流合琴江

合一水東北流來會

鯉湖溪出縣西南鯉湖埠北流折而東北經巾山東麓又東北

經縣城西北又東北有縣南水自城南東北抱城來會又東北入琴江

又東有支流通

揭陽水又東過揭陽縣城南有支津夾城左右自揭

陽水來會稍東分為二派一東北流會亭山水及揭

陽水

亭山水出縣北梅岡南流與琴江支渠合

又東南至潮州府治之西

南英塘鋪南又分二派一東會韓江一東南流又合

一西來水經浮洋鋪北又東南會韓江即澄海西北

境也琴江正派自揭陽縣城之東南南流有一水南

自惠來縣北和平司北流經山陰城東北至南砲臺

來會又東南為大港至潮陽縣北入海分為三口

一南

經潮陽縣城又南至海門所之西草蕪舖之東入海
一從縣北境泥嶼角嶼之南入分二港一南至海門
所之東磊口門入海一東至
澄海縣西南之歐江寨入海

自潮陽江口而西南曰惠來南港又西曰碕石港
曰小清西港又西南曰海豐縣東南之大德港西
南之金籠港又西曰小漠港皆南入海者

水道提綱卷十七

欽定四庫全書

水道提綱卷十八

原任禮部侍郎齊召南撰

粵江

上

五嶺以南水最大會滇黔兩粵衆流至番禺入南海
曰粵江實四瀆外之巨瀆也其源有三曰東江曰北
江曰西江西江源流最遠滇黔粵西之大川悉匯即
盤江也今序次自東江始

東江即古龍川水兩源一出江西安遠縣南山

山北水為廉水

北入貢江山南水南流為東江上源

南流曰鎮水入廣東和平縣北界

大竹園之東又南有小溪自西南來會折東南流會

北來一溪又東南有合水自北來會即東北源也一

出江西安遠縣南曰鶴子水東南流入和平縣東北

界又東南會東北二小水折而南流與鎮水會曰合

水又東南有水自東北來注之折而南有紫雲山水

自西來注之又東南受北一小水折南流受西一小

水又東南受東北一水及西一水即龍池山水也又

東南經龍母山西北有一水東北自江西長寧縣北

山合數水南流而西來會曰尋鄔水今曰尋都江

尋都

江自長寧縣東北合三源曰溫溪西北合三源曰保
水南流經縣東西南流受西來之河嶺水東來之老
鵝河曰馬蹠江又南經新平司西曰尋都江又西
南入廣東龍川縣東北界曰龍江為東江別源

又

南流折而西受東南來一水又西流受北一水又西

受東南來之太乙岩水又西經新田鋪北又西南流

而和平縣城左右諸溪自西北合數水東南來會

和平

西北水曰利溪出江西界鮮山排巖山合二水東南流至縣西南境會西南一小溪折而東流經縣城南有東溪北自城東來會東溪三源西北曰九連山水北曰五花嶂水東北曰赤石南水合而南經城東與利溪會又南折而西又南折而東南流數十里有一溪自東北來會又東南數十里有大溪西自洋塘凹會諸山水東南流折而東百餘里來會又東南與龍川江合鎮水合水自入界屈曲經和平北而東而東南又折而西至會利溪凡二百數十里南流經大壩西及東水壩之東曰東龍江又東南數十里折西南流又南經龍川縣城東有官坑水自東北來注之又西南流經縣城南受城西北來小水又西南受北來小水又西南受西

北來一水折南經藍口司西受東南一水又西南流
經洪軍塘南又西折而南受西一小水受東南一水
又西南流至河源縣東北有新豐江西北自連平州
合諸水東南流曲曲至河源北境與西來之長寧縣

羅紋水合而南來會江流大盛

新豐江源出連平州西北與江西界山曰

蜜溪水東南流會東北來二水又東南流會西來一
水經州西南有沐河自西南山來會折而東流經州
城南又東有十二排山西水北自界上南流來會又
東南流有內管水東北自十二排山東西南流來會
其水口即大埔店之北也又東南流受西南來一溪
又東流有忠信水北自九連大山南流會梨潭及西

來三水而南來會又東南數十里受西來及東來小
水二又南曰新豐江受西來大水一又東南受東北
來大水一折西南流數十里而長寧溪自西北來會
長寧溪二源一東北出連平州西北境之石亞山
兩洞合東南流折而西南數十里受東西小溪三又
西南流有溪自西北合四水東南流來會又東南流
經長寧縣東北境又東南流而縣前溪自縣城南合
西南山西水東北流又合一北水而東來會又東南
流數十里曰羅紋水受北一小溪又東南數十里受
北來一水又東流經平陵墟北又東南流與新豐江
會二水既合南流數十里有赤水合二澗自西來會
又東南至鳳凰山西南麓與龍川江會 新豐江及
羅紋水源流俱三百餘里 又南經河源縣城東又南受城南西來

一水又南受西一小水又曲曲東南流有神江東自

咸魚村合數水西南流來會又有一溪自西山合二

澗東南流來會又南流受東一小水又西折而南有

欖溪東北自永安縣來會

欖溪出永安縣北三殿山西流經縣城西北又西南八

十里有溪東南自羊角山合數水西流來會又西流受北一水又西受北來天字山水又西經馴雞司南又西稍北曲曲數

十里入龍川江

又西南曲曲經檳榔潭北折而東

南經釣魚村蓬瀛村西又西南經草鞋歷北又西折

而西南至惠州府城東北有淮水自南合數水北流

經城東而北來會

淮水出府治歸善縣西南境之梅沙尖即金斗嶺之西與山也東北

流經黃岡壩東又折而東數十里有大鵬水自南來會于碧甲司之西北又折東北流數十里有白馬水東南自船灣西北流有平山司南水東自姨嶺西流俱來會又東北經鳳迤山東麓又西北流經鼓角山西麓又北經府城折而西經城北有橫槎水南自城東又北入龍川江

西來會又折而西北流經博羅縣城西南又西北有榕溪自東北來注之溪口即合竹洲稍西有雲母溪北自羅浮山南流合西北之香溪來注之溪口即鮎魚角洲也又西南流有水南自銀餅嶺松柏嶺西北流來注之又折西北流至馬嘶洲有水自北來注之

又西流至東莞縣東北之江口北有增城縣會東北
龍門縣諸水南流南自新安縣柑坑山水北流並來

會

龍門鰲溪三源一出縣西北虎獅山曰大溪東南
流有高明水西自鐵岡山合二水來會又東南流

有鳳山水自東來會又南有蓼溪嶂水自西南來會
折而東流至龍門縣城西南又東南流其北源北自
桂峯山曰白沙水南流經城東而西南流來會又東
南流其東源曰路溪東北自平陵山合麒麟岡水西
南流來會又西南流數十里有墨湖水自東南來會
又西南經東澗山北又西南有雙石山水自北來羅
陽河南自羅浮北麓來俱會曰鰲溪又折西北流受
北來永清水又西流至增城縣北境有派潭水合澄
溪山水南流來會又折南流受西二小水南經增城
縣城東又南數十里至江口入龍川江柑坑山水

出新安縣東境北流折而西北合諸山水經東莞縣東南境又北經深溪山及神山西麓于縣東北境將至江口先分一支西南流經京口司南又西東江於經東莞城北又西入海口其正支北入東江江口歧為二支一西北流會鰲溪水折而西南一西南流會柑坑水又西復合經東莞城北境之官海鎮南京口司北又西有綏福水西北自古華山龍岡來注之又西受自北來之南樵嶺水江至此已西南與海港相接支津經絡洲嶼其南即東莞西境之中堂司也東江又西受北一小水折西南流經番禺縣東

境之鹿步司南受北來羅岡山溪其南即金釵營大
洲也又西受北來白雲山水過琵琶洲其南即沙灣
司地又西至廣州府城東南有北江支津會北自從
化及花縣水東南流經府城東而南來會又西經城
南北江自北來西江自西來並會是三江口也又南
入於海

北江即古湏水源出南雄府治保昌縣有三源 北源
出縣北與江西南安府界之梅嶺小梅關東南流經

紅梅司東曰大庾河又東南折而南流有鯉魚河自西北來會又東南流至府東北有保水合昌水自東來會 保水即東北源也出東北與江西界山二澗合西南流經洪崖山麓又受西北一小水東北一水又西南流與昌水會 昌水即東南源也出東與江西界山西北流會北來龜湖水又西北有馮大山二水自南合而來會水勢頗盛俗曰湏江又西北數十里會保水又西十餘里會大庾河 三水既合西南

流至府城東南折而西經城南有凌水連水自西北

來會

凌水出西北與江西界山東南流有連水自西北山合三水東流來會又東流數十里折東南

流五十餘里至府城西南隅與湏江會

又西南經楊歷岩東麓有修仁

水自東南來會

修仁水出保昌東南境山二水合西北流百餘里入湏江

又西南

經都塘鋪北又西南有龍潭水自東南來會

龍潭水自南山

西流為潭又西流會南來之安水又西北經都塘鋪南

又西南經始興縣東北

境又西流過縣北又西有始興溪自東南合諸水西

北流經城西南而北來會

始興溪上源出縣東與江西界之峽頭嶺北山西南

流數十里有朔水自東南來會折西北流六十里有
小武當山水自南來會又西三十里有清化水東南
自鞋山來會又西北流四十里經始興縣城西南有
肥水南自九仙山北流曲曲會西南來之官石水又
折東北流會南一水而北流來會過江口墟北又西
又西北至江口墟之東北入湏水

受北來一水又西經總舖南又西折西南流經雞籠
墟南受東南來之零溪又西南有錦江西北自仁化

縣來會

錦江二源東北源出仁化縣與湖南界桂陽
縣之東南山東南流合二小水曰三江口折

而西南流經仁化東北境珠子山東又西南經紫嶺
西又南至丹霞山而西源來會西源出桂陽縣之南
山二水合而南流曰兩江口又南入仁化北境經珠
子山西曰小湏水又東南流與東北源會二源既合

西南流經縣城東南又南流有吳竹嶺水自西北來
會曰錦江折東南流又南流折而東南會湏江此水
亦湏江別源也又西南經韶州府治曲江縣東北境南受小

水二北受小水一又西南經府城東南又南有樂昌

縣水自西北合諸溪東南流經城西南而南來會

樂昌

水出湖南宜章縣西南山東南流入縣界經漁家塘
南又東南會北來一水又東南會南來一水又折東
流會北一水又東會南來一水又東有一溪北自湖
南宜章縣東南流入界經黃岡村西又東南經羅渡
司東又南會司西水又東南來會二水既合東南數
十里至縣西有周山羅水合三澗自北來注之又東
南經縣城南又東南有白雲洞水自北來注之折而
南流有猺坑水自西來注之又南數十里有牛口水

西自瑤山來注之即乳源縣北境水也折東流受東北來一水又東南數十里經府城西南又南與湓江

會又西南流經山麓有漠溪西自乳源縣來注之漢

二源一出西北界瑤山合三澗東流折而東南經臘嶺南其西南源出黃金嶺者東北流合數水來會又東南流經乳源縣城南又東南經破分凹北又東南數十里入湓江對岸即虎榜山也又南有

沙溪東自鉛山西流經南華舖前來注之又西南有

宣溪自西南來注之宣溪出陽山縣東北山兩水合南流折而東北流經砦嶺北又

東北經青山北又東北經胡家村北有一水又南經北自泰豐山來會又東流數十里入湓江

髻山西又南經清溪村西西受一水有溪自東北來

注之又南稍西經英德縣北境山麓又南經縣城東

南有翁江東北自翁源縣會諸水西南流來會

翁江源出

翁源縣東北展旗山上庄鋪西流合北來之桂了山水西南流經莫村北又西南數十里受東南來二小水西流有王華山水自西北合一水來會折而南又合東南來一水折而西流曰翁溪曲曲經三華鎮南又西南流北受水源山梅嶺溪水東南受龍頭鋪水又西南經縣城東南又西有羅水北自豹耳山西南流合一水南流經城西曰江鎮河來會又南流有臘溪河自東南合獨玉山五指山二水北流又合東一水北數十里折而西北合東北來之陳礫水又西北合北一水數十里來會折西南流有寨角河及蒲嶺水自西合而來會又西南數十里經象岡司北有隆水東南自潮水岩西北流合東北來之馬鞍山二水

又西北合東南來之沱水又西北經司前來會始曰
翁江又西流有瀧頭水合二澗自東南來會又西與
湔江會 此水源流三百餘里受巨溪甚多 折而西流又西南經碧落洞

西至江口塘東南而匯水西北自陽山縣會連山連

州諸水來會亦巨川古所謂湟水也

湟水源出連山縣西南境北與

湖南江華縣界山曰分水凹其西南即廣西界地
匯水二源合而東流五十里有橫水西北自界山來會
又東有溪合四水自西南來會又東稍北三十里有
上敬水自北山來會又東經縣城南又東有小水沖
溪自西北而南經城東來注之又東受南來八排
水折而東北流經三江口鎮東又東北至連州西南
受南來一水又東北至州城西南而州西北山四水
合而南經城西來會又東經州城南又東折南流經

黃泥塘西又東南流受東北一水又南流有水南自
分水嶺北合獅子山諸溪東北流經九十九重山西
麓來會又東南經芙蓉山東又東南至連山縣北境
有龍潭水北自太甲塘黃金嶺南流來會折西南流
經大東山東受西一小水稍南受東一小水經雷公
坑東又南經縣城西南又東南有一水西南自重山
合四溪東北流百餘里來會折而東流有鍾唐山水
自北來注之又東南流數十里有獅子山水自西南
來注之折東流有白羊山水自北來桂溪水自東南
來並會又東南數十里有明月岡南水自西南合三
溪東流來會又東流有桃溪合二水自北來注之又
東南曲曲流至英德縣南之江口塘南而東與湑江
會連州西北水一出北境與湖南界之方山西南
流合西北來順頭嶺南水折東南流合西來之巾子
山北水又南合東北一水又東南合西北來之天堂
嶺水又東南流折而東至州西北錦坑山南麓有六

梯山水自北來合東北來鳳頭嶺星子司水及東來之中山水而南流經州城西南入沅水沅水源流五百餘里沅江既合沅水水勢大盛南流經香爐峽入清

遠縣北境西南流又折東南有琵琶江自東北合北一水西流來注之又南稍西有一水東自標幡嶺前山西流來注之又西南經縣城東南受南來王子嶺水又西至縣南受城西南溪水又西南有漆水西北自漆源山來注之折南流受東南來之黃旗山水又西南流經黃巢磯龍披山又西南受西北來之迴岐山

水又西南分為二派支津西南流曰綏江經醉翁山
東又南經三水縣城西又西南與西江之支津會折
而東經縣南又東南會北來支津又東南至西樵山
折而東至江口司北又分一支南通西江又東北經
佛山鎮南過荔支灣柳漁浦於廣州府城之西南北
會北江而南會西江也正派自綏江口東流折而南
又分一支南通綏江及西江支津又東流經靈洲山
帶岡北蜺殼岡南又東南中有大洲又東有花縣水

自北來會

花縣水二源一出縣東北山西南流經縣城東南又西南流經種魚塘南而西水來

會西水出縣西大潭山東南流合西南一水東流數十里有溪自北來會又東南經種魚塘西而東會

東水二流既合又南又有從化縣流溪合諸水自東曲曲數十里入北江

北來會

花縣正當廣府之北從化縣在其東北有流溪出縣東北高山南流合一水又西南合東

來一水西南流數十里北合高雲紫草山二水西南經雲台山東麓又南經縣東南境受東南一水折西

北流經縣南有西溪自縣北湯泉之南合二水南流又合東西二水曲曲經雲台山西麓又西南流經縣

城西而南與流溪會二水既合又西南流經太平墟西又西南八十里有二溪自北合而南流來會又西

南經廣府城東北境之白雲山北又西流數十里至石門北西會北江此水源流三百里自此水而東

重山相連其水皆
匯入東江者也

北江至此又分二派中有大洲南

流其東派會從化水於石門南為巨浸分支津東南
經廣府城東而南會東江於珠江口也正派南流至
府城西郊為巨浸曰柳漁浦於城西南會西江水及
東江水又南入海

西江合黔桂鬱三巨川源長流遠為嶺南巨瀆水勢十
倍於龍川湏水而三巨川中黔鬱尤遠合於廣西潯
州府城之東黔即北江右江鬱即南江左江也與桂

水合於梧州府城之西亦曰三江口東經肇慶至廣州府曰西江今序次自桂水始

桂江即古灘水亦曰灘江與湘水同源而分流南北者也源出廣西桂林府興安縣南之海陽山北流曰海陽江受數水至鳴玉洞山折東北流至縣東南遂北為分湘灘灑其東北經全州至湖南北入洞庭湖者湘江也

前見

灘江自分湘灘灑北流十餘里經縣城東北折而西挹城北而西南流三十里有大溶水及六

洞水北自六洞司合而來會

大溶水出六洞司東北山南流經司東折而西

至白竹舖東有六洞水自西北與湖南界山東南流經司西南來會又西南入離

又西南有

小溶江合左右二水自西北界來會又西南有銀江

西北自界山東南流合西南來之讀書山水來會

此水

稍長百餘里即靈川縣北境水也

又西南經靈川縣城東南又西南

有白石湫水自西來注之又西南折正南流而西南

經府治臨桂縣北境將近府城分為二派一東南流

經城東而西南一西南流經城西而東南復合其西

南流者有陽江自西北合二水南流來會於城之西北復分一支西南流至城西南隅復會其東南流者中有沙洲至城東有癸水自東北來注之又南分一支十餘里復會於東南境也離江自府東南流二十里有馬溪自東北合東南之靈溪西流來會

馬溪出桂臨縣

東北山南流有一水自東北來會即海陽山桃花源之西南嶺水也又南數十里至縣東南境有靈溪自東南山來會折而西流入折西南流有相思江自西

離江俗呼此水為非水

會永寧州永福縣諸水北會義寧縣諸水來會

永寧州北

境與生苗界有黃源水出黃源山東南流數十里有一水自西來會又東南流會東北一水又東南至州東境有州西北八寨隘南水東北流合北山一水又東北折東南流經州城東北又有州東南水自穿岩堡北流合西來一水又北合西來城南一水又北經城東而北合而東流十餘里來會黃源水又東南經興隆村西南有大長江自北合一水南流經村東南來會又東南四十里經永福縣西南境有一水自北來經縣城西而南注之折東流至縣南而分為二派其一南流折而西南至雒容縣南為洛清江以西會柳江見後文其一東北流會桂江此相思江之所以得名也東流環縣城之東南而北二十里分二支一西北流中有沙洲又北曰白石江經破村西而東北與義寧縣之義江會于兩江埠之東一東北流有常寧水東南自獨秀山西北流合南來之異魚塘水又西北來會又東北數十里而白石江之會義江折而

東南流者復合也 義江出義寧縣北界生苗中東南
流入界又折而南有二水西北自苗界合而東流來
會又東南流經桑江司西南有桑江自東北山來會
折西南流有靈秀山水自西北來會又南經縣城西
又南有縣東二溪自東北合而西南經城南來會又
有一溪自西北來注之又西南經鰲橋西又西南曲
曲數十里至兩江埠與白石江會也 白石江既會
義江折東南流二十里而支津復合又東流過銅鼓
壚南受北來一水又東南流五十餘里受南來之南
溪水又東稍北曲曲流六十里曰相思江與灘江會
源流 灘江既會相思江東南流數十里折南流曲
四百里

曲百里經兩山間又東南流經畫山西寶山東又南
有龍頭山水自東北合二澗南流經畫山東麓而南

又合東來一溪西經穿岩之北來注之折西南流經

陽朔縣東北境有翠屏水自西北來注之

翠屏水二源一曰甘

岩水東南流一曰龜潭水在龍隱山之北東流而合又東折而東南流經翠屏村之東又東南數千里東

入灘

又南數十里折東南流經縣城東北而南有縣

溪合西南山諸水自西來注之

陽朔前溪三源一出縣西北之實子山及

金泉山二流合而東南六十餘里一出縣西實子山西南麓東南流合犀潭水而南一出縣西南境修仁

縣北之大山及蘇山合而東北流又南合一水又東北流八十餘里會西源又東北會西北源又東經縣

南而東入灘江

又南受東北來伏荔司前水又東南經平樂

府北境浮嶼山西麓又南至府城西北有龍江自東

北恭城縣合諸水來會

龍江出恭城縣東北與湖南界龍虎關之北大山有水西

流曰坪川源會北來二水折西南流經栗木關西又西南經鎮峽司西有水東北自鳳山西南流經司南而西來會始曰龍江又西南有水自東來會又南有丁秉水西北自抱子山東南流合東北一水東南流經甘岩北麓而東來會又東南流經龍印山福田岩西麓又東南經縣北又東南經城東中有沙洲有下山源水自東北來會又西南經縣城南而西又西南有島平源水自縣西北朝帽山北東流合北來甘岩南水折東南流數十里經縣西南之金龍山麓南入龍江龍江又西南有馬峰山水合東南一水自東南來注之又西南經青島村南又西經府城北入灘江此水多泉源所滙長三百餘里

南經府

城西稍南有荔水西自荔浦縣西南合修仁縣修仁

諸水東北流來注之

荔水出荔浦縣東南與永安州界銀山之北通天嶺東北天門

山之東北流三十里有丹溪自西來會又北折而西
北曲曲數十里至縣東北境又折而西南至縣城東
而修江自城南而東北來會修江源出修仁縣西
北境舊縣山東南流三十里折東流二十里又東南
流三十里有一水自西南合三溪來會又東南合北
來修仁山水又南合馬浪水又東南二十里折北流
至縣城西南分為二支一支北經城西而北受西北
來二水折而抱城北而東一支東經城南有橫牆水
南自山中北流來會又抱城東而北二支復合東北
流經青山寨北又東北至荔浦縣西南境受北來一
水又東北經縣城東南丹水塘之西受東南一水又
北抱城東與荔水會荔水既各修江於城東北流

有一水自北合二溪來注之折而東北曲曲流數十
里經古羅山南馬鬃山北又東入離江修江合荔
水長三百里又折而東而南經長灘塘西又南流經永安

州東北境石鼓山東麓巴江塘西又南稍東經黃牛

塘西又南受西南來一水即永安東南山水也又南

經昭平縣北境有金芝岩東水自東北來注之

金芝岩在

恭城縣東界富川縣西界與下山源水相近南流又
東南曲曲經金芝岩山間百餘里至鯉魚山東麓折
西南流經佛岩西麓又西南流經雙鳳桃溪玉城三
山西麓又西南經五峯北麓合北來一水又西南六
十里入離江此水又南稍西經縣城東南有銅鼓
嶠曲流三百餘里

山水合冬華山水自西南來注之又東南曲曲流有

雙橋水自東南合東北一水西南流來注之折南流

稍西又東南流經倒水東又南稍西又東南蒼梧縣

北境有二水自東北合而來注之

一曰茶亭山南水
南流一曰峽山水

西南流合而西南入灘江又南經梧州府城西而潯州府所合之

黔鬱自西南來會東流經城南又東入廣東界東南

至廣州府會湏江龍川而入南海

湘離灑西五度九
分極二十五度五

分梧州府會黔鬱西五度
六分極二十三度五分

桂江源流曲折行九百里

水道提綱卷十八